


廿二史攷異 一〇





異攷史二廿

(十)

撰昕大錢

廿二史考異卷六十

舊唐書四

張鎰傳

朔方節度使齊邱之子也。齊邱既未立傳。當云父齊邱。開元中朔方節度使

蕭復傳

普王爲襄漢元帥。以復爲戶部尚書。統軍長史。以復父名衡。特詔避之。元帥府有行軍長史。衡與行同音。故特避之。李賀父名晉肅。論者譏其舉進士。亦其類也。

李揆傳

遷司勳員外郎。考功郎中。並知制誥。扈從劍南。拜中書舍人。郎官知制誥。蓋始於明皇時。

李泌傳

其先遼東襄平人。而魏太保八柱國司徒何_{此字誤}弼之六代孫。今居京兆。以史例。當云京兆人。

李抱玉傳

光弼自將于中灘城。李光弼傳。作中潭城。且抱玉守南城事。已見光弼傳。此亦重出也。

盧從史傳

其先自元魏已來冠冕頗盛。此篇首不書里居。但言先代冠冕之盛。亦非史例。

崔元翰傳

李汧公鎮滑臺。辟爲從事。李汧公者。李勉也。此採用誌狀之文。未合史法。

賈耽傳

尋以本官爲東都留守。東都畿汝南防禦使。南字衍。

姜公輔傳

授左拾遺。召入翰林爲學士。歲滿當改官。公輔上書自陳。以母老家貧。以府掾俸給稍優。乃求兼京兆尹戶曹參軍。唐時翰林學士無品秩。但爲差遣。故常帶它官。支其俸給。公輔本以左拾遺入翰林。歲滿改官。乃兼京兆尹戶曹參軍。元和初。白居易亦以左拾遺爲翰林學士。及當改官。引公輔例。除京兆尹戶曹參軍。蓋拾遺雖爲兩省供奉官。秩止從八品。京府參軍。秩正七品。俸給較厚。故恬退者喜居之。居易爲左拾遺。賦詩云。歲愧俸錢三十萬。及兼戶曹。賦詩云。俸錢四五萬。月可奉晨昏。廩祿二百石。歲可盈倉。困此實錄也。

王鎔傳

僞梁加尙書令及唐室中興去僞尙書令之號。此傳前云河東節度使李克用虎視山東方謀吞噬後云唐室中興去僞尙書令之號詞意自相矛盾。

劉忬傳

今昌平故里朝廷改爲尉卿司徒里尉上當有太字卿當作鄉。

李忠臣傳

寶應元年七月拜忠臣太常卿同正兼御史中丞。淮此下當脫四字十一州節度尋加安州刺史仍鎮蔡州。是

歲先以來瑱爲淮西河南十六州節度使治安州而以裴蒺代瑱鎮襄陽。旣而瑱竟不行乃除忠臣爲帥傳云加安州刺史則治所亦當在安州矣。又據新史方鎮表是時別有蔡汝節度使。乾元元年置本名豫汝節度

大厯八年始廢則忠臣初授淮西時未得鎮蔡州也。

大厯五年加蔡州刺史淮西節度移治蔡州當在是年方鎮表在八年未知其審。

嚴綬傳

綬在鎮九年以寬惠爲政士馬蕃息境內稱治案裴垍傳稱綬在太原政事一出監軍李輔光綬但拱手而已本傳諱而不書。

蕭昕傳

遷中書舍人兼揚府司馬佐軍仍舊。據此則唐時中書舍人亦有帶出外任者而史不多見。

杜佑傳

貞元十三年徐州節度使張建封卒其子愔爲三軍所立詔佑以淮南節制檢校左僕射同平章事兼徐泗節度使。據本紀在貞元十六年。

裴垍傳

李吉甫自翰林承旨拜平章事。李吉甫傳不云爲承旨。

李吉甫傳

父栖筠代宗朝爲御史大夫名重于時國史有傳。案李德裕傳亦云祖父自有傳然本書卻無栖筠傳。

權德輿傳

德輿居西掖八年其閒獨掌者數歲。唐人稱門下爲左掖中書爲西掖。據六典中書舍人本六人中葉以後常以它官知制誥行舍人之職。德輿以貞元十年遷起居舍人卽兼知制誥至十八年拜禮部侍郎故云居西掖八年也。至德以後始置翰林學士專掌內制而中書但掌外制西掖之員漸少乃有一人獨掌制誥如權德輿者。

奚陟傳

時中書令李晟所請紙筆雜給皆不受。但告雜事舍人令且貯之。新史百官志舍人以久次者一人爲閣老判本省雜事。所謂雜事舍人也。

蔣係傳

李德裕用事惡李漢以係與漢僚壻。係與漢皆韓愈之壻。

劉昌裔傳

楊琳之亂昌裔說其歸順。當作楊子琳。脫子字。及琳授洛州刺史。洛當作瀘。

高固傳

高祖侃永徽中爲北庭安撫使。有生擒車鼻可汗之功。官至安東都護。事具前錄。此篇蓋沿憲宗實錄之文。故有事具前錄一語。侃以右驍衛郎將擒車鼻。見突厥傳。

劉迺傳

高祖武幹武德初拜侍中。卽中書侍郎林甫兄子也。案宰輔表無侍中劉武幹名。此必誤也。宰相世系表武幹會寧五州留守。金鄉公。

孔戣傳

遷吏部侍郎轉左丞。案韓退之撰戮墓誌云改給事中權知尙書右丞明年拜右丞。與此傳不合。韓集有作左丞者。注家定從右而以新舊史爲誤恐未然。

上謂裴度曰嘗有上疏論南海進蚶菜者詞甚忠正此人何在卿第求之。度退訪之或曰祭酒孔戣嘗論此事度徵疏進之。案新書戣爲華州刺史明州歲貢淡菜蚶蛤之屬戣以爲自海抵京師道路役凡四十三萬人奏罷之墓誌亦云明州歲貢獨此云南海蓋史家因其爲嶺南節度使妄益南海字耳。此新史之勝於舊者。

長慶四年正月卒時年七十三。誌作七十四。

武元衡傳

曾祖德載。當作載德。武后時封潁川王。

祖平一終考功員外郎修文館學士。事在逸人傳。案舊史無逸人傳平一事。史亦闕之。

八年元衡自蜀再輔政時太白犯上相歷執法占者言今之三相皆不利始輕末重月餘李絳以足疾免。明年十月李吉甫以暴疾卒至是元衡爲盜所害。案天文志及本紀俱不載元和八年太白星變事。且李絳罷相在九年二月吉甫之卒卽在其年十月傳云明年亦誤。

鄭從讜傳

國之名臣文忠有焉。此傳詞多溢美。蓋出於門生故吏誌狀之文。

烏重裔傳

烏重裔潞州牙將也。宰相世系表張掖人。

盧簡辭傳

三辟諸侯府。此亦沿誌狀之文。當時以方鎮爲諸侯也。李宗閔傳。隨牒諸侯府。楊授傳。釋褐從事諸侯府。李讓夷傳。釋褐諸侯府。楊巖傳。釋褐諸侯府。路巖傳。累辟諸侯府。

王正雅傳

其先太原尹。東都留守翊之子。尹當作人。不連下讀。

伯父翊。代宗朝御史大夫。案翊事已附其弟翊傳。彼傳但云爲御史中丞。

柳公權傳

拜右拾遺。充翰林侍書學士。翰林有侍書書詔。學士惟見於公權傳。

殷盈孫傳

昭宗郊祀圓丘。兩中尉楊復恭及兩樞密皆請朝服。盈孫上疏。案昭宗紀。太常博士錢珣。李綽等奏論。不及盈孫名。

元稹傳

二十四調判入第四等。此試書判拔萃科也。四等尙爲優選。則上三等尤難得。所謂久虛之等也。

白敏中傳

懿宗卽位。徵拜司徒門下侍郎平章事。復輔政。案本紀失載。敏中復相事。

趙宗儒傳

昭肅晏駕。昭肅當作昭愍。敬宗諡也。

錢徽傳

吳郡人。當作吳興人。

文昌面奏言徽所放進士鄭朗等十四人。皆子弟。藝薄不當在選中。朗乃宰相珣瑜之子。是年重試被落。後竟爲宰相。

令狐楚傳

入爲吏部尙書。仍檢校右僕射。故事。檢校官高者便從其班。楚以正官三品。不宜從二品之列。請從本班。優詔嘉之。僕射從二品。尙書正三品。唐初檢校官。乃任職而未正授之稱。故新史宰輔表。開元以前。檢校左右僕射。侍中中書令者。皆與正官同列。肅代以後。檢校但爲虛銜。故檢校之三公三師。不入于

表令狐楚以檢校僕射但從正官尙書之班也。

牛僧孺傳

以其所管漢陽汝川兩縣隸鄂州。汝當作汭。

鄭覃傳

復爲閔孺所排。謂宗閔僧孺也。兩字名不宜舉一字。

鄭朗傳

長慶元年登進士甲科。是歲錢徽知禮部舉放進士十四人朗居第一。穆宗命王起白居易覆試朗等十人皆落下。此傳書登科而不書黜落失其實矣。

李紳傳

高祖敬元則天朝中書令封趙國文憲公自有傳。案敬元相高宗非武后時本傳又不載其封諡。

李珣傳

武宗卽位之年九月與楊嗣復俱罷相出爲桂州刺史。桂管觀察使三年長流驩州。案武宗紀會昌元年三月貶桂管觀察使李珣端州司馬杭州刺史裴夷直驩州司戶此武宗卽位之次年也嗣復與珣同時貶州司馬其貶驩州者乃裴夷直非李珣且爲司戶非長流傳殆誤矣珣嗣復罷相紀在八月而

傳云九月亦不合。

李德裕傳

史臣曰臣總角時。亟聞耆德言衛公故事。案史局非一人之手。而論辭稱臣總角時。果何人之語乎。且自開運二年。史成。上溯會昌之末。已百年矣。蓋沿唐人紀載之詞。而未及修正也。

嗣襄王燭傳

嗣襄王燭。案舊史不敍燭之世系。考肅宗子僉。敬宗子執中。俱封襄王。新史以燭爲僉之裔孫。通鑑亦以爲肅宗玄孫。

李宗閔傳

元和四年。復登制舉賢良方正科。案本紀裴垍傳。俱云元和三年。

李讓夷傳

時起居舍人李褒有痼疾。請罷官。李固言欲用崔球。張次宗。鄭覃曰。崔球游宗閔之門。赤墀秉筆記。注爲千古法。不可用朋黨。如裴中孺。李讓夷。臣不敢有纖芥異論。此事又見鄭覃傳。覃傳言起居郎闕。據此乃是起居舍人闕。非郎也。

崔慎由傳

清河武城人。案崔融傳云：齊州全節人。而此云清河武城人。蓋舉其姓望也。曾祖翹，位終禮部尚書東都留守。崔融傳云：翹，開元中中書舍人。

趙光逢傳

鼎沒於梁，累官至宰輔。王鎔、王處存傳稱梁爲僞梁，此傳亦云鼎沒于梁，皆後唐史臣之詞。

張楊傳

乾符三年，出爲華州刺史。其年冬，檢校吏部尚書、鄆州刺史、天平軍節度觀察等使。四年卒于鎮。案僖宗紀：楊爲天平軍節度使，在二年七月。此云三年冬，似誤也。紀稱四年四月，黃巢攻鄆州，陷之，逐節度使薛崇，蓋楊卒而崇代之。新本紀：楊卒于五年，乃若承薛崇之後者，誤之甚矣。

輝王時拜中書侍郎平章事。本紀題哀帝，而此傳及司空圖傳稱爲輝王，似非史法。

王徽傳

其先出於梁魏，魏爲秦滅，始皇徙關東豪族實關中。此傳敘徽先世，首尾二百餘言，皆碑狀之辭，文於史例無當也。

劉崇望傳

其先代郡人，隨元魏孝文帝徙洛陽，遂爲河南人。八代祖隋大理卿坦生政會。政會傳在列傳第八卷。

崇望先世出於代北。當見政會傳。

徐彥若傳

父商。咸通初。加刑部尙書。充諸道鹽鐵轉運使。遷兵部尙書。四年。以本官同平章事。六年。罷相。檢校右僕射。江陵尹。荆南節度觀察等使。案懿宗紀。咸通六年二月。以御史中丞徐商爲兵部侍郎。同平章事。四月。轉中書侍郎。七年八月。兼工部尙書。八年十月。兼刑部尙書。十年正月。以門下侍郎兼刑部尙書。同平章事徐商。檢校兵部尙書。江陵尹。荆南節度使。蓋商以咸通六年入相。十年罷相。其拜相之初。官止兵部侍郎。中間三轉官。至罷相出鎮。始得檢校兵部尙書耳。傳所書拜罷之年及官秩。皆誤也。

柳璨傳

龔爲中書舍人。判史館。引爲直學士。案史館無直學士之名。蓋引爲直館也。唐時三館職事人。皆以學士目之。史家不察。僞爲直學士爾。

若循兩省遷轉拾遺。超等入起居郎。兩省供奉官拾遺。從八品。補闕。從七品。起居郎從六品。給事舍人正五品。諫議大夫正四品。由拾遺敘遷。當歷補闕。若遷起居郎。是爲超等。柳璨以拾遺驟加諫議入相。越過正從九等。

李可舉傳

中和中累官至檢校太尉。僖宗紀廣明元年六月加可舉檢校司徒同平章事。唐自中葉以後方鎮以使相爲最榮。此傳書檢校太尉而不書平章事。是舍重而舉其輕者矣。

何進滔傳

累官至司徒平章事。新書宰相表無進滔名。蓋檢校司徒非真司徒也。唐會要文宗朝使相五人亦無進滔名。

何宏敬。大中後宣宗務其姑息。繼加官爵。亦至使相。案武宗紀會昌四年八月以魏博節度使檢校尙書右僕射同平章事何宏敬進封廬江郡開國公。是宏敬除使相乃在武宗朝。非宣宗姑息使然也。唐會要武宗使相四人宏敬已預其一。

韓簡傳

遂移兵攻鄆。鄆帥曹全晷出戰。爲簡所敗。死之。鄆將崔君裕收合殘衆。保鄆州。簡進攻其城。半年不下。河陽復爲諸葛爽所襲。簡因欲先討君裕。次及河陽。乃舉兵至鄆。君裕請降。尋移軍復攻河陽。行及新鄉。爲爽軍逆擊。敗之。案朱瑄傳鄆帥薛崇爲王仙芝所殺。鄆將崔君裕權知州事。全晷知其兵寡。襲殺君裕。據鄆州。自稱留後。光啓初韓簡欲兼并曹鄆。以兵濟河。全晷出兵逆戰。死之。瑄收合殘卒。保州城。然則君裕權知鄆州。乃在全晷之前。全晷襲君裕而代之。非全晷死而君裕爲之守也。全晷旣死。保鄆

州者乃朱瑄。非君裕。此傳殊疏謬矣。兩傳卷第相連。不知何以抵牾若此。

羅宏信傳

子威。當云紹威。脫紹字。

王重榮傳

乾寧初。重盈卒。據唐會要。重盈在僖昭兩朝。皆在使相之列。重盈子珙。亦昭宗朝使相也。而傳皆不書。朱溫初伏鎮定。舊書例稱朱全忠。獨王珂。王處直兩傳。稱朱溫。

諸葛爽傳

明年正月。簡爲牙軍所殺。據此傳。韓簡以中和元年十一月。爲爽所敗。二年正月。爲牙軍所殺。而韓簡傳云。簡爲爽軍擊敗。單騎奔迴。疽發背而卒。時中和元年十一月也。則簡但以兵敗病死。非爲牙軍所害。其年月亦異。僖宗紀亦云。簡爲部下所殺。而書于中和三年二月。其互異如此。

宦官傳

田令孜。爲予報令公。建至此無所歸也。僖宗紀。中和三年七月。賜陳敬瑄鐵券。已稱守太尉同平章事。此傳王建稱敬瑄爲令公。蓋昭宗嗣位之始。加至中書令也。

酷吏傳

王旭。曾祖珪。貞觀初爲侍中。尙永寧公主。案。珪封永寧郡公。未嘗尙主。尙南平公主者。珪之子敬直也。

儒學傳

蓋文達。文懿者。貝州宋城人。宋城當作宗城。

文苑傳

袁朗。朗十三代祖。漢司徒滂。此敘袁氏先世百六十餘言。冗雜無當。大意謂琅邪王氏。世有台輔。不若袁氏之世篤忠貞也。

賀知章。知章與越州賀朝萬、齊融、揚州張若虛、邢巨。案下文云。朝萬止山陰尉。齊融崑山令。若虛兗州兵曹。巨監察御史。皆舉其名。今鄆縣有育王寺常住田碑。祕書監正字萬齊融撰。蓋賀朝萬一人。萬齊融又一人也。傳脫一萬字。

李白。山東人。山東非唐時州縣之名。杜甫詩。雖有山東李白之稱。不可以入史也。白旣家任城。卽當云任城人矣。李琪傳云。山東甲姓盧士玫。傳云。山東右族。其失與此同。

李商隱。大中末。仲郢坐專殺左遷。商隱廢罷還鄭州。案。柳仲郢節度東川時。商隱在其幕府。以仲郢傳考之。則云大中。轉劍南東川節度矣。在鎮五年。美績流聞。徵爲吏部侍郎。非坐事左遷也。其坐決